


# KANTONALNI INDEKS OTVORENOSTI

---

## Otvorenost kantonalnih vlada i skupština u Bosni i Hercegovini





# **Kantonalni indeks otvorenosti: Otvorenost kantonalnih vlada i skupština u Bosni i Hercegovini**

Autorice: Danira Karović i Amina Izmirlić Čatović

Sarajevo  
Mart, 2022.



# Kantonalni indeks otvorenosti: Otvorenost kantonalnih vlada i skupština u Bosni i Hercegovini

Kantonalni indeks otvorenosti mjeri stepen do kojeg su vlade i skupštine kantona u Bosni i Hercegovini otvorene prema građanima/kama i društvu i u kojoj mjeri građani/ke dobijaju pravovremene i razumljive informacije od svojih institucija.

Istraživanjem je bilo obuhvaćeno svih deset kantonalnih vlada i skupština u BiH: Vlada/Skupština Unsko-sanskog kantona, Vlada/Skupština Posavskog kantona, Vlada/Skupština Tuzlanskog kantona, Vlada/Skupština Zeničko-dobojskog kantona, Vlada/Skupština Bosansko-podrinjskog kantona Goražde, Vlada/Skupština Srednjobosanskog kantona, Vlada/Skupština Hercegovačko-neretvanskog kantona, Vlada/Skupština Zapadnohercegovačkog kantona, Vlada/Skupština Kantona Sarajevo i Vlada/Skupština Kantona 10.

Otvorenost kantonalnih vlada i skupština u Bosni i Hercegovini mjeri se kroz 75 indikatora za kantonalne vlade i 78 indikatora za kantonalne skupštine, a vodeći se međunarodnim preporukama i primjerima dobre prakse. Indikatori su razrađeni u kvalitativne i kvantitativne indikatore, koji se ocjenjuju na osnovu dostupnosti informacija na zvaničnim internet-stranicama institucija, kvaliteta pravnog okvira za pojedinačna pitanja, drugih izvora javnog informisanja i upitnika koji se upućuju institucijama, a podijeljeni su na četiri principa: transparentnost, pristupačnost, integritet i učinkovitost.

Princip transparentnosti podrazumijeva da su organizacione informacije, kao i informacije o budžetu i postupcima javnih nabavki, javno dostupne i objavljene. Princip pristupačnosti odnosi se na obezbjeđivanje i poštovanje procedura za slobodan pristup informacijama te poboljšanje dostupnosti informacija kroz mehanizam javnih rasprava i jačanje interakcije sa građanima/kama. Princip integriteta obuhvata mehanizme za prevenciju korupcije, sprovođenje etičkih kodeksa i regulaciju lobiranja, dok princip učinkovitosti uključuje pitanja koja su tiču monitoringa i evaluacije politika koje sprovode institucije.

Udruženje građana i građanki “Zašto ne” pokrenulo je tokom 2021. godine prvi ciklus istraživanja otvorenosti kantonalnih institucija u BiH, koje finansijski podržava Ambasada Sjedinjenih Američkih Država u BiH.

Cilj naših aktivnosti je da analiziramo stanje u ovom domenu rada javne uprave, doprinesemo implementaciji reformi i utičemo na jačanje principa dobrog upravljanja te, u konačnici, pomognemo samim institucijama da iste efikasnije primijene u svom radu.

Na web stranici [kantonalniindexotvorenosti.zastone.ba](http://kantonalniindexotvorenosti.zastone.ba) možete pronaći više detalja o našem radu i ovom projektu.

Prosjek dobijenih rezultata ukazuje da su skupštine deset bh. kantona ipak nešto otvorenije od vlada, s obzirom na činjenicu da prosjek otvorenosti kantonalnih skupština iznosi oko 34%, dok je za vlade taj prosjek oko 27.5%.

Kada su u pitanju kantonalne vlade, najotvorenija je Vlada Kantona Sarajevo sa 43.12%, zatim Vlada Tuzlanskog kantona sa 41.53% i Vlada Zeničko-dobojskog kantona sa 39.54%. Preostalih sedam kantonalnih vlada ne zadovoljava ni 30% postavljenih indikatora, pa je tako Vlada Posavskog kantona ostvarila rezultat od 26.86%, Vlada Kantona 10 zadovoljava tek 26.44% indikatora, a Vlada Bosansko-podrinjskog kantona Goražde 25.98%. Vlada Zapadnohercegovačkog kantona ostvarila je rezultat od 21.41%, Vlada Srednjobosanskog kantona 20.99%, Vlada Unsko-sanskog kantona 20.26%, dok je rezultat otvorenosti Vlade Hercegovačko-neretvanskog kantona 10.34%.

Najbolji rezultat otvorenosti, 54.33%, zabilježila je Skupština Kantona Sarajevo. Zatim slijede skupštine Zeničko-dobojskog, Zapadnohercegovačkog i Tuzlanskog kantona, sa rezultatima otvorenosti 43.27%, 42.65% i 41.8%. Nešto lošiji rezultat ostvarile su skupštine Posavskog kantona sa 36.38%, Unsko-sanskog sa 34.37% i Bosansko-podrinjskog kantona Goražde sa 33.43%. Skupština Srednjobosanskog kantona ostvarila je rezultat od 26.79% otvorenosti, Skupština Kantona 10 tek 19.81%, dok najlošiji rezultat bilježi Skupština Hercegovačko-neretvanskog kantona sa 7.14%.

# Otvorenost kantonalnih vlada

Iako svih deset kantonalnih vlada ima zvaničnu web stranicu i funkcionalan pretraživač, sa izuzetkom Vlade Zapadnohercegovačkog kantona, nijedna vlada nema objavljen organogram, a biografija premijera/ke može se naći samo kod Vlade Hercegovačko-neretvanskog kantona.

Jedan od indikatora koji osam vlada ispunjava odnosi se na objavljen Poslovnik ili Zakon o Vladi na zvaničnoj web stranici, no iste nije bilo moguće pronaći kod vlada Srednjobosanskog i Hercegovačko-neretvanskog kantona.

Tek tri kantonalne vlade – TK, BPK Goražde i ZDK, imaju objavljen Program/Plan rada, dok se kvartalni i/ili polugodišnji izvještaji o radu ne mogu pronaći ni kod jedne vlade, a samo vlade TK i ZDK imaju objavljene godišnje izvještaje o radu. S druge strane, indikator kojeg zadovoljavaju sve vlade osim Vlade Hercegovačko-neretvanskog kantona jeste objavljivanje aktuelnih strategija na zvaničnoj web stranici.

Iako je na web stranicama svih vlada moguće pronaći spisak javnih funkcionera/ki sa njihovim kontaktima, samo vlade Kantona Sarajevo i BPK Goražde imaju informaciju o njihovim platama. Informacije o platama moguće je pronaći u Registru zaposlenih u javnom sektoru Kantona Sarajevo i Registru zaposlenih i imenovanih lica u BPK Goražde.

Spisak državnih službenika/ca i namještenika/ca s njihovim zvanjima može se pronaći samo kod vlada Kantona Sarajevo i Srednjobosanskog kantona.

Nešto više od polovine kantonalnih vlada blagovremeno objavljuje dnevni red sa materijalima za narednu sjednicu, no to nije praksa u slučaju vlada BPK Goražde, USK, PK i HNK. Nakon provedenog istraživanja, može se zaključiti da većina kantonalnih vlada nema praksu objavljivanja dokumenata razmatranih na sjednicama, sa izuzetkom vlada TK, PK i ZDK, kao ni zapisnika sa sjednica, osim Vlade Posavskog kantona, ali ni praksu objavljivanja transkripta sa sjednica.

Još jedan indikator kojeg ne ispunjava nijedna kantonalna vlada tiče se audio/video prenosa sjednica, ali i objavljivanja strategija ili pravilnika kojima se uređuje pitanje otvorenosti i transparentnosti institucije, kao i objavljivanja komunikacione (PR) strategije. Kada su strategije u pitanju, izuzetak je Vlada Tuzlanskog kantona na čijoj je web stranici bilo moguće pronaći ove dokumente.

Iako se kod svih kantonalnih vlada mogu pronaći godišnji planovi javnih nabavki, razlika je u činjenici da neke vlade, pored aktuelnog plana javnih nabavki, objavljuju i planove javnih nabavki za posljednjih nekoliko godina, dok se kod određenog broja može naći samo, naprimjer, aktuelni plan javnih nabavki.

Tek nekolicina vlada ima praksu objavljivanja poziva i odluka o javnim nabavkama, dok se ugovori, aneksi i izvještaji o javnim nabavkama mogu naći samo kod Vlade Kantona Sarajevo kroz Registar podataka o javnim nabavkama Kantona Sarajevo, čime jedino ova vlada ispunjava indikator koji se odnosi na dostupnost informacija o javnim nabavkama putem zasebnog online portala.

Po pitanju budžetske transparentnosti, na zvaničnim stranicama moguće je pronaći dokument aktuelnog budžeta, kao i budžeta za prethodne godine, sa izuzetkom vlada HNK i ZHK, no budžet za građane/ke moguće je pronaći samo na zvaničnoj web stranici Vlade BPK Goražde.

Kantonalne vlade također nemaju praksu objavljivanja periodičnih (mjesečnih, kvartalnih i polugodišnjih) izvještaja o izvršenju budžeta, dok se godišnji izvještaj o izvršenju budžeta može pronaći tek kod polovine vlada – BPK Goražde, USK, PK, ZDK, SBK i Kantona 10.

Pored istraživanja i provjere zvaničnih web stranica kantonalnih vlada, jedna od poduzetih aktivnosti bila je i slanje upitnika o radu institucije i zahtjeva za slobodan pristup informacijama. Na upitnik je odgovorila tek polovina vlada – USK, TK, ZDK, SBK i ZHK, dok su na zahtjev za pristup informacijama u zakonskom roku odgovorile samo tri institucije – vlade Posavskog, Srednjobosanskog i Zapadnohercegovačkog kantona.



Kada su u pitanju treninzi, obuke i radionice za službenike/ce kantonalnih vlada, niko osim službenika/ca ZDK nije učestvovao na treninzima/obukama/radionicama iz oblasti slobodnog pristupa informacijama, dok treninzima/obukama/radionicama iz oblasti otvorenih podataka (open data) i antikorupcijskih tema, poput konflikta interesa/prevenције korupcije/zviždača, nije prisustvovao niko.

Sa izuzetkom Tuzlanskog kantona, nijedna druga vlada nema dostupna uputstva na koji način građani/ke mogu da izraze zabrinutost ili podnesu žalbu u vezi s odlukama i akcijama Vlade, dok direktni online kanal za komunikaciju imaju tek četiri vlade – TK, HNK, ZHK i Vlada Kantona 10.

Što se tiče prisustva na društvenim mrežama, nijedna od deset kantonalnih vlada nema strategiju ili plan u pravcu razvijanja kapaciteta državnih službenika/ca za korištenje društvenih mreža, kao dio njihovih službenih zadataka, a nalog na Facebooku imaju tek vlade KS, BPK Goražde, USK, PK i Vlada Kantona 10, dok Twitter koristi samo Vlada Kantona Sarajevo.

Informacije, odnosno odgovori na tražene ZOSPI zahtjeve, nisu objavljene ni na jednoj web stranici kantonalnih vlada, dok ažurirane informacije/uputstva za ostvarivanje prava na slobodan pristup informacijama (vodič za slobodan pristup informacijama) imaju samo vlade KS, TK i ZDK.

Zasebnu rubriku sa svim podacima i informacijama relevantnim za oblast slobodnog pristupa informacijama imaju tek tri vlade – TK, BPK Goražde i ZDK.

Objavljen Plan integriteta, ili neki drugi antikorupcijski dokument koji podrazumijeva mjere za prevenciju i eliminaciju različitih oblika koruptivnog i neetičnog ponašanja unutar institucije, na zvaničnoj web stranici imaju tek vlade TK, PK i SBK.

Srednjoročni program rada nema nijedna vlada, dok dugoročni program, odnosno plan rada, na zvaničnim web stranicama imaju tek Vlada Kantona Sarajevo i Vlada Tuzlanskog kantona.

Većina kantonalnih vlada nema praksu objavljivanja imovinskih kartona javnih funkcionera/ki, osim Vlade KS, koja kroz Registar podataka o imovini nosilaca javnih funkcija u Kantonu Sarajevo objavljuje ove informacije.

Iako institut javnih konsultacija ne postoji zvanično, te samim tim ne postoji ni obaveza organizovanja javnih konsultacija prilikom izrade nacrtu zakona, jedan od ciljeva procesa demokratizacije jeste i uspostava partnerskog odnosa između institucija vlasti i građana/ki, a konsultacije s javnošću bi svakako pozitivno uticale i na kvalitet propisa i zakona koji se donose. S tim u vezi, bilo bi poželjno uspostaviti mehanizam konsultacija prilikom izrade propisa i strateških dokumenata.

# Preporuke za unapređenje otvorenosti kantonalnih vlada

S obzirom na činjenicu da prosječni rezultat otvorenosti svih deset kantonalnih vlada zadovoljava tek oko 27.5% postavljenih indikatora te da nijedna kantonalna vlada ne zadovoljava ni polovinu postavljenih indikatora otvorenosti, evidentno je da je potrebno unaprijediti određene indikatore kako bi se otvorenost ovih institucija podigla na viši nivo i bila pristupačnija građanima/kama.

U nastavku navodimo informacije, dokumente i alate koje bi institucija trebala da ima na zvaničnoj web stranici kako bi bila pristupačnija i otvorenija za građane/ke:

- Organogram institucije
- Biografija premijera/ke
- Program/Plan rada Vlade za posljednje tri godine
- Izvještaj o radu Vlade za posljednje tri godine
- Informacija o platama javnih funkcionera/ki
- Spisak državnih službenika/ca i namještenika s njihovim zvanjima
- Blagovremeno objavljivanje dnevnog reda sa materijalima za narednu sjednicu
- Praksa objavljivanja dokumenata razmatranih na sjednicama
- Praksa objavljivanja zapisnika i/ili transkripta sa sjednica
- Audio/video prenos sjednica
- Objavljivanje strategija ili pravilnika kojima se uređuje pitanje otvorenosti i transparentnosti institucije na zvaničnoj web stranici
- Objavljivanje komunikacione (PR) strategije na zvaničnoj web stranici
- Objavljivanje poziva i odluka o javnim nabavkama
- Objavljivanje ugovora i aneksa o javnim nabavkama
- Objavljivanje izvještaja o javnim nabavkama
- Budžet za građane/ke

- Objavljivanje periodičnih (mjesečnih, kvartalnih i polugodišnjih) izvještaja o izvršenju budžeta
- Objavljivanje godišnjih izvještaja o izvršenju budžeta
- Dostupna uputstva na web stranici Vlade o načinu na koji građani/ke mogu da izraze zabrinutost ili podnesu žalbu u vezi s odlukama i akcijama Vlade
- Direktni online kanal za komunikaciju na web stranici Vlade
- Nalog na Facebooku
- Nalog na Twitteru
- Objavljivanje odgovora na tražene ZOSPI zahtjeve
- Objavljivanje ažuriranih informacija/uputstava za ostvarivanje prava na slobodan pristup informacijama (vodič za slobodan pristup informacijama)
- Zasebna rubrika sa svim podacima i informacijama relevantnim za oblast slobodnog pristupa informacijama
- Objavljen Plan integriteta ili neki drugi antikorupcijski dokument koji podrazumijeva mjere za prevenciju i eliminaciju različitih oblika koruptivnog i neetičnog ponašanja unutar institucije na zvaničnoj web stranici
- Objavljen srednjoročni i/ili dugoročni program rada
- Objavljivanje imovinskih kartona javnih funkcionera/ki
- Uspostavljanje mehanizma konsultacija prilikom izrade propisa i strateških dokumenta
- Učešće službenika/ca na treninzima/obukama/radionicama iz oblasti slobodnog pristupa informacijama, iz oblasti otvorenih podataka te antikorupcijskih tema, poput konflikta interesa/prevencije korupcije/zviždača

# Otvorenost kantonalnih skupština

Iako većina kantonalnih skupština ima zvaničnu web stranicu, što je pozitivno ocijenjeno, ipak treba istaći da web stranici Skupštine Hercegovačko-neretvanskog kantona nije bilo moguće pristupiti tokom istraživanja, te je zbog toga ova kantonalna skupština dobila negativnu ocjenu.

Kada je u pitanju funkcionalnost web stranice, treba istaći da kod tri kantonalne skupštine – Hercegovačko-neretvanske, Zapadnohercegovačke i Kantona 10, pretraživač web stranice nije bio u funkciji. Osim Tuzlanskog kantona, nijedna druga kantonalna skupština na zvaničnoj web stranici nema organogram ni biografiju predsjedavajućeg/e Skupštine.

Određeni nedostaci uočeni su i kod indikatora koji se odnose na podatke i informacije o strukturi i djelokrugu radnih tijela Skupštine, kao i o strukturi aktuelnog saziva Skupštine (predsjednik/ica, potpredsjednici/e, sekretari, poslanici/e, struktura i članstvo u skupštinskim grupama). Isti je slučaj i sa biografijama i kontakt-podacima skupštinskih zastupnika/ca, te se u određenim slučajevima biografije i/ili kontakt-podaci svih zastupnika/ca ne mogu pronaći.

Kada su u pitanju informacije o platama javnih funkcionera/ki u kantonalnim skupštinama, jedino Kanton Sarajevo posjeduje Registar zaposlenih u javnom sektoru Kantona Sarajevo, u kojem se mogu pronaći informacije o primanjima. Napominjemo i da BPK Goražde i SBK imaju registre zaposlenih, no ovi registri nisu potpuni, dok je Vlada Kantona Sarajevo objavljivanjem Registra zaposlenih u javnom sektoru, Registra imenovanih lica i Registra podataka o imovini napravila značajan iskorak u poređenju sa drugim kantonalnim vladama.

Što se tiče objavljivanja programa rada ovih institucija, kod šest kantonalnih skupština bilo je moguće pronaći programe rada za posljednje tri godine, dvije skupštine su na zvaničnoj web stranici imale objavljen samo jedan program rada, dok tri nisu nijedan. U slučaju izvještaja o radu, samo se kod Skupštine Tuzlanskog kantona mogu pronaći izvještaji za posljednje tri godine, dok je kod skupština Posavskog i Unsko-sanskog kantona pronađen po jedan izvještaj o radu.

Sve kantonalne skupštine (sa izuzetkom Skupštine HNK čijoj se zvaničnoj web stranici nije moglo pristupiti tokom istraživanja) imaju objavljen Ustav Kantona, Poslovnik o radu te blagovremeno objavljen dnevni red za narednu sjednicu skupštine. Ipak, sa izuzetkom Skupštine Zapadnohercegovačkog kantona, nijedna druga skupština ne objavljuje podatke o prisustvu zastupnika/ica na plenarnim sjednicama i sjednicama odbora, kao ni listinge glasanja.

Većina kantonalnih skupština ne omogućava ni audio ni video prenos plenarnih sjednica, kao ni sjednica odbora, dok je transkripte sa plenuma moguće pronaći samo kod Skupštine Zapadnohercegovačkog kantona. Kada je u pitanju audio/video prenos, jedino Skupština Kantona Sarajevo omogućava live stream, a audio i/ili video prenos sjednica moguće je pronaći i kod skupština Zapadnohercegovačkog, Posavskog i Unsko-sanskog kantona.

Strategiju ili pravilnik kojim se uređuje pitanje otvorenosti i transparentnosti institucije, kao i komunikacijsku (PR) strategiju, bilo je moguće pronaći samo na web stranici Skupštine Zapadnohercegovačkog kantona.

Kada su u pitanju javne nabavke, potrebno je istaći da Kanton Sarajevo posjeduje Registar javnih nabavki kroz koji su dostupne informacije o planovima javnih nabavki, pozivima, odlukama, ugovorima, aneksima i izvještajima o javnim nabavkama.

Čak pet kantonalnih skupština nema nikakve ili ima jako oskudne informacije o javnim nabavkama, dok skupštine Unsko-sanskog, Tuzlanskog, Zapadnohercegovačkog i Zeničko-dobojskog kantona objavljuju informacije poput godišnjih planova javnih nabavki, poziva i odluka, no nijedna skupština, sa izuzetkom Kantona Sarajevo, ne objavljuje ugovore.

U pogledu budžetske transparentnosti, većina kantonalnih skupština na zvaničnim web stranicama objavljuje budžete, pa je kod šest moguće pronaći kantonalne budžete za nekoliko posljednjih godina, kod dvije skupštine pronađen je po jedan budžet, a kod skupština Kantona 10 i Hercegovačko-neretvanskog kantona (čija zvanična web stranica nije bila u funkciji tokom istraživanja) nije pronađen nijedan budžetski dokument.

Osim Bosansko-podrinjskog kantona Goražde, nijedna druga kantonalna skupština nema objavljen dokument budžeta za građane/ke ni polugodišnji izvještaj o izvršenju kantonalnog budžeta, dok se kvartalni izvještaji mogu pronaći kod skupština Zeničko-dobojskog i Unsko-sanskog kantona. Završni godišnji izvještaj bilo je moguće pronaći samo za skupštine Zapadnohercegovačkog, Zeničko-dobojskog, Unsko-sanskog i Bosansko-podrinjskog kantona Goražde.

Pored istraživanja i provjere zvaničnih web stranica kantonalnih skupština, jedna od poduzetih aktivnosti bila je i slanje upitnika o radu institucije i zahtjeva za slobodan pristup informacijama. Većina kantonalnih skupština odgovorila je na upitnik, sa izuzetkom Tuzlanskog, Bosansko-podrinjskog i Hercegovačko-neretvanskog kantona, dok je na zahtjev za pristup informacijama odgovor u zakonskom roku stigao tek od polovine institucija – skupština Tuzlanskog, Zeničko-dobojskog, Srednjobosanskog, Zapadnohercegovačkog kantona i Kantona Sarajevo.

Kada je u pitanju pristup informacijama, nijedna skupština ne objavljuje informacije, odnosno odgovore na tražene ZOSPI zahtjeve, većina nema objavljen vodič za slobodan pristup informacijama (sa izuzetkom Kantona Sarajevo te Tuzlanskog i Zeničko-dobojskog kantona), a samo na stranici Skupštine Tuzlanskog kantona postoji zasebna rubrika sa svim podacima i informacijama relevantnim za oblast slobodnog pristupa informacijama.

Nijedna kantonalna skupština nema dostupna uputstva na koji način građani/ke mogu da izraze zabrinutost ili podnesu žalbu u vezi sa odlukama i akcijama skupštine, dok direktni online kanal za komunikaciju imaju tek četiri skupštine.

Sa izuzetkom Unsko-sanskog kantona, službenici/e devet kantonalnih skupština nisu učestvovali na treninzima/obukama/radionicama iz oblasti slobodnog pristupa informacijama, dok na treninzima/obukama/radionicama iz oblasti otvorenih podataka nisu učestvovali službenici/e nijedne kantonalne skupštine.

Kada su u pitanju treninzi/obuke/radionice na neku od antikorupcijskih tema, poput konflikta interesa/prevencije korupcije/zviždača, učestvovali su samo službenici/e Unsko-sanskog i Zapadnohercegovačkog kantona.

Od deset skupština, nijedna nema uspostavljen sistem e-peticija ni Twitter nalog, dok Facebook nalog imaju tek skupštine Posavskog kantona i Kantona 10.

Osim što ni na jednoj zvaničnoj web stranici kantonalnih skupština nisu dostupne informacije o zaštiti zviždača, tek četiri skupštine imaju objavljen etički kodeks, koji reguliše pitanja konflikta interesa, upotrebe državne svojine, poklona i usluga i političke aktivnosti, kao i kršenja ovog kodeksa.

Također, nijedna od ovih institucija na zvaničnoj web stranici nema objavljen Plan integriteta (ili neki drugi antikorupcijski dokument) koji podrazumijeva mjere za prevenciju i eliminaciju različitih oblika koruptivnog i neetičnog ponašanja unutar institucije.



# Preporuke za unapređenje otvorenosti kantonalnih skupština

S obzirom na činjenicu da je prosječni rezultat otvorenosti svih deset kantonalnih skupština oko 34%, a da samo jedna kantonalna skupština zadovoljava nešto više od polovine indikatora otvorenosti – 53.35% – potrebno je unaprijediti određene indikatore kako bi se otvorenost ovih institucija podigla na viši nivo i bila pristupačnija građanima/kama.

U nastavku navodimo informacije, dokumente i alate koje bi institucija trebala da ima na zvaničnoj web stranici kako bi bila pristupačnija i otvorenija za građane/ke:

- Funkcionalan pretraživač na web stranici institucije
- Organogram institucije
- Biografija predsjedavajućeg/e Skupštine
- Potpune informacije o strukturi i djelokrugu radnih tijela Skupštine
- Potpune informacije o strukturi i djelokrugu aktuelnog saziva Skupštine (predsjednik/ca, potpredsjednici/e, sekretari/ke, poslanici/e, struktura i članstvo u skupštinskim grupama)
- Biografije i kontakti skupštinskih zastupnika/ca
- Program/Plan rada Skupštine za posljednje tri godine
- Izvještaj o radu Skupštine za posljednje tri godine
- Podaci o prisustvu zastupnika/ica na plenarnim sjednicama
- Podaci o prisustvu zastupnika/ica na sjednicama odbora
- Listing glasanja na plenarnim sjednicama i/ili sjednicama odbora
- Transkripti sa skupštinskih sjednica
- Godišnji plan javnih nabavki
- Pozivi i odluke o javnim nabavkama
- Ugovori i aneksi o javnim nabavkama
- Budžet za građane/ke
- Polugodišnji i/ili kvartalni izvještaj o izvršenju kantonalnog budžeta

- Finalni izvještaj o izvršenju budžeta
- Zasebna rubrika sa svim podacima i informacijama relevantnim za oblast slobodnog pristupa informacijama
- Pokretanja aktivnosti na društvenim mrežama Facebook i Twitter
- Uputstva na koji način građani/ke mogu da izraze zabrinutost ili podnesu žalbu u vezi sa odlukama i akcijama Skupštine
- Direktni online kanal za komunikaciju
- Uspostavljanje sistema e-peticija
- Učešće službenika/ca na treninzima/obukama/radionicama iz oblasti slobodnog pristupa informacijama, iz oblasti otvorenih podataka te antikorupcijskih tema, poput konflikta interesa/prevencije korupcije/zviždača
- Etički kodeks
- Plan integriteta



